



COMUN DE MAREO

PROVINZIA DA BALSAN

Stimé Consèi de comun, stimada popolaziun de Mareo co ascuta pro,

Al é sté na gran emeziun canche i á aldí da ester l'ombolt de Mareo y i á ince atira sontí na gran responsabilité. Adöm ala junta, al consèi de comun y a dōta la popolaziun de Mareo mo tóli dant da aministré nosc comun con coscionza, con dōtes mies forzes, por le bëgn dla jont.

Iu ô ester Ombolt de dōtes le zitadines y zitadins de dōt Mareo y i ô mo dé da fá por n vire de nüsc zitadins plü sigü, plü iüst y contënt.

Ince danter nos messunse indô ciafé n lian plü strënt y na majera crëta, deache ma enló vára da trá ete y da coresponsabilisé la popolaziun intiera te proiec y tles vijjiuns por i agn che vëgn.

Iö ne me toli nia mat dant na majera presënza te Comun, mo ince danter la jënt. I ó ester dlungia mi zitadins, ascuté sö sü problems y chirí cun ëi les soluziuns che vá le miú.

I ó indô porté ite plü vita tla dialetica y tl discurs politich y endespré insciö danter la jënt plü interes por la "cossa publica".

I me dará da fá por che la popolaziun áis indô plü crëta tl Comun de Mareo, nosc bel Comun, y i me dará ince da fá por che la ligrëza y l'entusiasm da lauré deboriada crësces y vëgnes indô plü sintida.

Vigne proposta, vigne iniziativa ciafará söa lerch y gnará valutada. Nostes dezijiuns orunse tó por le ben publich, l'enterés publich vá dant a chel dl singul.

Premessa

Nosc comun á na storia vedla y é dagnora sté tl zënter di gran svilups dla storia ladina y tiroleja. Al é en gran comun, con na spersa de ca. 16.000 ha y ensciö le 10 maiú comun di 116 comuns de Südtirol. Le comun de Mareo á passa 3.000 abitanc y confinëia con 9 comuns: S. Laronz, Bornech, Valdaora, Braies, Cortina, Badia, La Val, S. Martin y Lijun. La piza plü alta, Conturines, é de 3.077 m le post plü bas con Peraforada dessot, a 943m.

Le 74% dl teritore é sora i 1.600 m, 30% dl teritore é bosch y 21% de munts, le 30% da prés. Sce an ponsa che le 14 % ne nia produtif, 0,3% é gnüs frabichés.

Desch'í sëi é le comun partí ete te trei de maius païsc: Al Plan, La Pli y Rina, con situaziuns particulares por Mantëna y Longega y la bela carateristica dles viles.

La popolaziun é scialdi de lingaz ladin, mo ince tló da nos ciafa entrés plü jont da foradeca en daciasa. Le svilup demografich é entrés jü söpert y chel é en segno che an stá saurí.

Nosc comun é dorata en comun olache la jont se stá bun, olache la jont se vëgn y olache al é na gran orenté. Le comun é metü adöm da 3 païsc co é sides te söa storia, co te só svilup co ince te söa realté da encö empó dër desvalís. Le gran motor dl comun é sogü le turism co porta begnester, mo ince diversces problematiches: dantadöt tla fraziun d'Al Plan é le turism corsciü ti ultimi 20 agn dër dassen y scialdi duc á podü nen davagné. La fraziun d'La Pli á albü en svilup plü pegher tl tursim y dantadöt plü tl vers dl



COMUN DE MAREO

PROVINZIA DA BALSAN

Steuerkodex – Cod. Fisc. 81004190211

MWST.-Nr. - Part. IVA 00581260213

☎ (0474) 501023 Fax (0474) 501644

agriturism. Tlo é le laur da paura ciamó dër emportant y slarié fora y les tradiziuns plü vies. Rina n'á nia albü la poscibilité da jí dó ala ona "turism" y á enciö messü jí en ater trú co á ince porté a val' problem sce an ciara tanc che vá foradecá a lauré y spo gonot ince a víre. Tlo mëss le comun sogü chirí y ciafé soluziuns de svilup.

Cösc mat en cört por se recordé tan complés che nosc comun é.

Le zënter de nosta aministrazion mëss ester la popolaziun, la jont enstëssa co vír atló y co mëss se sté saurí, mat enciö podunse nos ince crësce adöm y jí inant desco comunité. Sce nos se stun saurí, sará ince chí co vëgn atlo da nos, sides migranc, personal co sciori, co se stará saurí.

Y sce i baiun che nosta jont mëss se sté saurí, baiunse ince dla cualité de vita, che i messun ince definí danö.

Nüsc paísc dëss vire, ester atifs y podëi se svilupé.

Comunicaziun y Informaziun

Se tolun dant da trá ete damperfora les categories, porsones tocades, baié fora y spo tó les dezijiuns.

La homepage vëgn laorada fora danö y ince fata a na moda da s'anüzé deplü por fonin.

Dun trëpa presënza y disponibilité ala jont co ó s'informé y porté dant sü crüzi. Metun da jí udiënzes sides dal ombolt co ince ai assessurs.

Orun tigní regolarmenter les "Bürgerversammlungen".

L'ombolt y i assessurs sará tresfora le plü che ara vá a disposiziun sides por telefon co por email y vigne edema con val' ora de udiënza. Samben ince sön apuntamont. Cösc val sambëgn ince por döt le personal de comun co laora de por de por nosta popolaziun.

Laur danter junta y consëi

Dantadöt ples dezijiuns emportantes, mo nia mat, se tolunse dant da baié con dötes les aconsiadësses y duc i aconsiadus, por che ai póis tó pert le plü ativamonter poscibl ala vita comunala. Orun entres endö formé de pici grups encer i aconsiadus ia, por ti dé a duc la poscibilité da laoré para.

Situaziun finanziara

Le comun de Mareo á dorata püc debic. Al é da ciaré tresfora che le comun áis scioldi assá a disposiziun. Le comun se financiëia sides con i scioldi co ti speta y vëgn dla provinzia co ince con les cultes co vëgn ete. Al é spo ince poscibl da damané finanzia monc a pert sides dla provinzia co ince dla EU y de chël orunse se crüzié deplü. Nia da desmuncé edl che le comun pó ince tó sö empresc, a 0 fit y sön investiziuns plü lunges desco ples scores edl da se fá en ponsier.

Les spëises mëss gní tignides sot a control ince tl dagní. Le managé bun i scioldi publics é önn di gran traverc de cösta aministrazion. Mo an mëss ince ester sinziars y dí che diversci scioldi di proscimi agn é belo gnüs adorés sö dla aministrazion da denant y ne sará nia plü a disposiziun.

Aministrazion generala

Te chisc proscimi 5 agn ói porte inant na aministrazion efiziënta y plü moderna: tlo ponsi dantadöt ala informatisaziun di sorvisc, la comunicaziun con la jont, l'organisaziun plü stronta di ofizi de comun y ince a

**COMUN DE MAREO**

PROVINZIA DA BALSAN

na forma de sozieté a carater publich (p.e. Srl o Coopertiva, municipalizzata) co podëss sorantó diversci compic y sorvisc dal comun y ensciö ester plü snela y manco burocratica co le comun enstëss.

Sügherté y proteziun zivila

La popolaziun de Mareo dëss se sontí sogüda. Na bona colaboraziun con le forzes dl ordin y con la proteziun zivila é dada y mëss gní intesificada: tlo ponsi dantadöt a na miú colaboraziun y coordinaziun danter les forzes co laora te cösc ciamp: stüdafüs, aiüt alpin, crusc blancia, forzes dl ordin, chi dai rüs y döta la proteziun zivila a na moda che düc säis ci fá canche al sozeda val'. Atló nen vára ince de na educaziun y de sensibilisé la jont da se tigní ales regoles y fá ci che al vëgn dit por nia mëter al prigo porsones, tiers y patüc. Samben mëss le comun ince investí tla proteziun zivila y tló edl da ciagé na forma che trames les perts póis programé miú ti proscimi 5 agn.

Al é ince da mëter aziuns cuntra le vandalism, co crësc ince tlo da nos entrés deplü.

Ambiont y natöra, ega

Gran pert de nosc comun é tl raiun UNESCO, co ne nia mat na bona strategia de marketing, desche valch mina, mo se sorandá dantadöt na gran responsabilité da porté cösc nosc patrimoine natural ales generaziun do nos. Messun y orun tigní cunt che al é da sconé nosc ambiont, da fá bel empara. Ince le post dl Recycling orunse svilupé inant y sensibilisé la jont dal post y ince i sciori da despartí entrés miú le ciomont.

An n'orëss nia dí, mo ince te nosc comun edl vigne tant meseria de ega da bëre. Se tolun dant da ciaré che al sides entrés ega assá: cëie ete fontanes nees y ressané les condütes.

Familia

La familia, desco unité sozuala plü picera s'á müdé trep tai ultimi agn. I mituns vëgn tres manco y i "Haushalte" entres mendri. Al é entres deplü co tira sö i mituns dassusc y la combinaziun danter laur y familia é rondunt por pices families en problem. De cösc mëss vigne aministraziun nen tigní cunt pa söes dezijiuns. Cösta aministraziun ará entrés en edl sön cösta sitauziun.

Jonëza

Le contat danter jogn, jones y aministraziun de comun é gnü tai ultimi 5 agn intensivé tres deplü ince con le consëi di jogn. I jogn é magari chi co se stonta deplü te cösc tomp de COVID, olache le relaziuns soziales y personales mëss gní smendrides al minimo. Al é porchel emportant che i ti dunse na man, por che ai póis s'encunté y sté adöm. Contribuí ala realizaziun de zëntri di jogn, de posc olache ai póis s'encunté y sté adöm, se divertí, cösc orunse fá.

Scolina y scora

La scolina y la scora é dër importantes por le svilup dles mitans y mituns. Nos düc lasciun nüsc mituns tles mans dles maestres por almanco 11 agn, cina che ai á 14 agn. Por che áres póis fá en bun laur y ensciö formé nüsc mituns por le dagní ól ince ester les dërtes infrastrotöres. S'impegnun porchel da mantigní les scolines y scores, da ciaré da dé inant le sorvisc de mensa y da dé döt l'aiüt poscibl é pö cösc en investimont diret te nüsc mituns y nostes mitans.

Sport

Ti ultimi agn edl gnü ressané le ciamp dal sport a Al Plan y ti proscimi agn orunse ressané ince la ciasa. Implü orunse jí inant con le proiet de na plaza recreativa ince a La Pli, olache al é belo gnü cumpré le grunt. Te düc i trei païsc dëssl ester la poscibilité da fá sport y ensciö mantigní na bona condiziun danter corp y

**COMUN DE MAREO**

PROVINZIA DA BALSAN

anima co porta a na maiú sanité por vignónna y vignönn. Mantignun y metun a post les infraströtöres sportives de döt le comun.

Cultura

La cultura ladina, le lingaz y l'identité orunse tigní alalt, revaluté y incentivé. Tlo ponsi ince al aiüt y al sostègn dles uniuns culturales, ai consëis de formaziun, mo ince a d'atres uniuns co laora tal ciamp dla cultura y dles tradiziuns. Te nosc comun ciafunse engröm de uniuns co porta inant nosta cultura y fej ince en gran laur sozial y de comunité. Porchel se tolunse dant da contribuí a cöstes ativités con sostègns finanziairs, con les ciases dles uniuns y i locai che i metun a disposiziun.

Sozial

Sun te tomps de crisa, economica, sanitaria y tosc sociala. Nia mat le COVID-19 se tól cá, mo ince söes consequenzes. Les consequenzes dles ordinanzes co vègn tutes, dles restriziuns con chères che i messun entrés endô vire y les tèmes por en dagní entrés plü compliché y malsogü. Degügn ne dëss se sontí susc y che co ó tó pert al vita sociala dëss se sontí daciasa tlo da nos. L'integraziun se basa sön en dialogh davërt, sön le respet.

Urbanistica

La lege sön l'urbanistica nea se mët dan' a de gran compic: messun laoré fora adöm le "Gemeindeentwicklungsplan" con dötes söes specificités y normes, adöm a dötä la popolaziun, porchel se lasciarunse daidé da firmes espertes che al vègnes fora val' de bun por le svilup de döt le comun. Ciarun da ciafé soluziuns por nosta jont, por i jogn, che ái sides bogn da se fá sö na ciasa y póis sté poscibilmonter te so païsc. Da slü jö é senz'ater le "Gefahrenzonenplan" co é belo gnü metü da jí y spëta le bëgnsté da Balsan. Cösc é ince en váre emportant tla urbanistica nea.

Le plan de svilup adöm a chël dal contrada (Entwicklungsplan y Landschaftsplan) vën laurés fora con trasparënza, tolënn ete la jont y con en acompagnamont profesional. Al mëss gní tut dezijiuns importantes por le dagní di païsc (p.e. "Siedlungsentwicklung y Siedlungsgrenzen") co ince por le plann dla contrada (Landschaftplan).

Implü edl da soralaoré diversci plans de atuaziun y ciaré che al pois nen gní scrit fora de nös, desco ince zones de fabriché alisiré te dötes les fraziuns.

Infraströtöres

Orun ciaré da mantigní les infraströtöres.

Dantadöt mo toli dant adöm ala junta da ti sté dó ales strades. Al é dampró da 100 km de strades rurales y ares ciara fora bindebo mal. Ti ultimi agn ères gnüdes rünades dantadöt dles interperies dal tomp, plöia, ega, ont y nëi y ultimamonter ince dai gran camions plëns de lignan. Tlo messunse dantadöt les mëter a post da pert dla sügherté y spo les laoré fora y asfalté danö damproia se fajenn en program co gnará spo comuniché ala jont. Al é ince da ciaré tres les delimitaziuns di pëisc y ciaré che ares vegni tignides ete. Orun lauré fora i plans dles strades plü enmalester y ince damané plü contribuc a Balsan. Por la manutenziun dles strades edl ince da chirí la colaboraziun con i paur, co á ince la disponibilité dles maschins, por alisiré ensciö la munt de laur di lauranc de comun.

Orun ince coordiné miú le laur da desparé.

**COMUN DE MAREO**

PROVINZIA DA BALSAN

Le mantegnimont y svilup dl orar dal Mareo-Bus é ince en travert de cösta aministrazion. Al dëss gní sensibilisé entres endô la jont da s'anüzé di mesi publics.

Damproia edl ince da ressané les condütes dles eghes blances y eghes pazes.

Na gran emportanza ti dunse al Internet: ala fira otica en particular, olache i an belo metü da jí y co gnará belo fata dl 2020 y ince con en sistem de punt radio dl comun por arjunje ince les ciases plü a desman.

Economia

La jont te nosc comun se stá valgamia bun, á na economia sana y ecuilibrada. Nosc impëgn vá dal vers che le firmes dal post póis avèi en dagní, sides bones da ti dé a nosta jont laur. Orun ince se tó dant da alzé i sorvisc ti paisc: i ponsi atló p.e. ales boteghes, co mancia a Rina, olache na soluziun é dan man, mo ince a La Pli. L'economia y le laur é elemonc esenziái por na bona cualité de vita. Na economia stabila y ecuilibrada assicurëia en bun svilup dl comun y porta ala popolaziun na bona sügherté sozuala. Le compit dl comun é arjigné ca les condiziuns che l'economia póis se svilupé.

Turism

Nos orun en tursim sann, co. fej sté saurí ince la jont dal post, basé sön nostes tradiziuns y nosta contrada. Tlo ól ester la colaboraziun de düc y cösc sará nosc travert, sides tl laur dl plann de svilup nõ co ince tl Leitbild. Önn en gran impëgn dla aministrazion comunala ti prosci agn sará chel da costruí na miú colaboraziun con la Assoziaziun turistica, da desfiré fora avisa i compic y le poscibilités da se daidé önn con l'ater a begn de düc. Orun laoré fora danö de cösc vers la convenziun nea.

Agricoltöra

Da dagnora encá é le laur da pair en gran pilaster de nosta sozieté, danter le laur efetif co ince desco motor de vita, danter tradiziun y ierpejun. L'importanza di paur ne nia mat chera dal mantegnimont dla contrada y dla natöra, dal sié i pres y les rödenes sön le teritore comunál, mo ince desco produzënt de alimentars, desco atur atif dla vita da vigne de y garant de na vita sana con y por la natöra. Porchel respetëia cösta aministrazion le laur da pair te söa emportanza. Le comun se dará porchel da fá che le pair ciafi la posiziun tla vita economica y sozuala che al se mirita, che al nasces na colaboraziun sana danter les categories economiches por lauré dal vers den svilup por le bëgn de döta la popolaziun, se baienn fora les cosses, fajenn na discusciun tlera y ordinada y tolenn spo les dezijiun plü adeguades. Nos sun por sostení i paur, nia mat te só laur, mo ince ciarënn dles infrastotöres, desco les strades d'azés, dles munts y di "usi civici".

Artejanat

Messun endô invié ia proiec por che nüsc mituns ciafi endô ligrëza tal laur manual, creativ y esenzial por düc nos, ligrëza por na maestria tal'artejanat. Tlo ponsi a na colaboraziun ciamó plü stronta danter scores y artejanat metënn da jí proiec de colaboraziun co feji i mituns y les mitans corioses por chisc laurs tan de valüta. Le comun se tól ince tlo dant da se crüzié dles condiziuns, por che i artejagn póis se lascé jö tles zones, ciafi le plü che ara vá i laurs publics y póis insciö ti dé laur a nüsc mituns y noste mitans.

Comerz y setur terziar

Le setur terziar y le comerz ti dá te nosc comun da laur a dër trepes porsones. Dó la statistica laora la mai ú pert dla jont de Mareo te cösc setur. Dantadöt é cösc en setur co pó ince píté laurs a tomp parzial y é ensciö



COMUN DE MAREO

PROVINZIA DA BALSAN

dër interessant por les ères/mames co ó dediché en pert dl tomp ala familia, mo á ince debojügn de se davagné val'. Le comun ó ince tlo cherié les condiziuns de svilup.

Svilup y program 2020-2025

Cösc program dëss ester na soravijiun de ci che i se tolun dant da fá i proscimi 5 agn, la concretisaziun spo dles cosses, di proiec gnará atuada y metüda tl program trienal y te chel anual, che i laurun fora adöm a os y metarun spo ann po ann a discusciun y a lita te cösc consèi.

La situaziun finanziaria dl comun é limitada y nos messarun tlocheré pa vigne porta por jí a do mësi implü, sides pla provinzia, a Roma co ince dla Uniun Europëica. Chisc mësi ne bastará nia por realisé duc i dejiders y nos messun mëter priorités y avèi tl ëdl dotes les trèi fraziuns dal comun co ince spo döt le comun te sòa complëssité.

Dantadöt por le proscimo ann sarál de jí inant y slü jö con i laurs belo metüs man dla aministraziun da denant y spo orunse ti dé priorité dantadöt a chisc proiec ti proscimi agn:

- manutenziun y sistemaziun de strades, olache al ti vëgn dé la priorité ala sügherté y spo metenn a jí en plann/program de sistemaziun damproia de dotes les strades
- coliamont internet asvelt soradöt le comun, le plü che ara vá con fira otica, y olache al ne nia meso con en punt radio
- Informatisaziun di sorvisc de comun, soralaurada y programaziun dla homepage dl comun, desco ince la comunicaziun sora i media soziai (p.e. Facebook, Instagram)
- “Gemeindeentwicklungsplan”, “Landschaftsplan” y laoré fora danö les normes dla urbanistica nea
- Adöm al conzet por la mobilité y viabilité la sensibilisaziun dla jont da lascé l’auto a ciasa le plü che ara vá
- Soralaurada dal “Leitbild 2008-2018” y svilup por le dagní
- Svilup dl laur da paura y dles munts (p.e. incentivé la produziun de alimentars, vonüda direta)
- Na miú programaziun dl bilanz con cerne y laoré jö i capitui dl bilanz
- Abelimont di zëntri di païsc
- Patezipaziun ai program de finziamont dla EU
- Rissanamont y ampliament dla scora elementare d’Al Plan
- Scrí fora zones da fabriché alisire dantadöt a Al Plan y La Pli
- Sostëgn y aziuns por le sport y le tomp lëde
- Resanamont y ampliament dl magazin di stödafüs a La Pli
- Picio ciamp dal sport con garage sotete a La Pli
- Costruziun dla sonta nea dla Crusc Blancia a Al Plan
- Mantegnimont dla rèi idrica, eghes blances y pazes
- Mioramont d’iluminaziun publica y di tretoars
- Renforzé i raporc danter les categories economiches y la popolaziun intiera por svilupé na bona cualité de vita por nos y por i turisc
- Jí ennant con le Saltá
- valorisaziun dla zona campo y “spiagetta”
- Sostëgn al resanamont dla cortina d’Al Plan

GEMEINDE ENNEBERG

Provinz Bozen – Südtirol



COMUNE DI MAREBBE

Provincia di Bolzano - Alto Adige

COMUN DE MAREO

PROVINZIA DA BALSAN

Steuerkodex – Cod. Fisc. 81004190211

MWST.-Nr. - Part. IVA 00581260213

☎ (0474) 501023 Fax (0474) 501644

Stimé consëi de comun,

I mëti sën a discusciun cösc program, co dëss se porté ti proscimi 5 agn. Diversces cosses n'árai nia punsé danfora, mo desco dit edl vign'ann la poscibilité da porté ete les cosses nees y co vá plü debojügn.

Sun gnüs lités por fá le miú che ara vá, te na situaziun nia saurida, olache i scioldi ne bastass mai y olache i messun mëter priorités.

Iolan

Felix Ploner _ ombolt